

四庫全書

史部

欽定四庫全書

史部

歷代名臣奏議卷三百四十

詳校官編修_臣周 瓊

編修_臣裴 勳覆勘

總校官編修_臣王 燕緒

校對官庶吉士_臣侍 朝

謄錄監生_臣陶鳴珂

欽定四庫全書

歷代名臣奏議卷三百四十

明 楊士奇等 撰

四裔

周靈王三年無終子嘉父使孟樂如晉因魏莊子納虎豹之皮以請和諸戎晉侯曰戎人無親而貪不如伐之魏絳曰諸侯新服陳新來和將觀於我我德則睦否則攜貳勞師於戎而楚伐陳必弗能救是棄陳也諸華必

叛獲戎失華無乃不可乎公曰然則莫如和戎乎
對曰和戎有五利焉戎狄洊居貴貨易土土可賈
焉一也邊鄙不聳民狎其野穡人成功二也戎人事晉
四鄰振動諸侯威懷三也以德綏戎師徒不勤甲兵不
煩四也鑒于后羿而用德度遠至邇安五也君其圖之
漢高帝罷平城歸韓王信亡入邊當是時冒頓為單于
兵強控弦三十萬數苦北邊上患之問建信侯劉敬劉
敬曰天下初定士卒罷於兵未可以武服也冒頓殺父

代立妻羣母以力為威未可以仁義說也獨可以計久
遠子孫為臣耳然恐陛下不能為上曰誠可何為不能
顧為柰何劉敬對曰陛下誠能以適長公主妻之厚奉
遺之彼知漢適女送厚蠻夷必慕以為閼氏生子必為
太子代單于何者貪漢重幣陛下以歲時漢所餘彼所
鮮數問遺因使辯士風諭以禮節冒頓在固為子壻死
則外孫為單于豈嘗聞外孫敢與大父抗禮者哉兵可
無戰以漸臣也若陛下不能遣長公主而令宗室及後

宮詐稱公主彼亦知不肯貴近無益也高帝曰善欲遣長公主呂后日夜泣曰妾太子一女奈何棄之匈奴上竟不能遣長公主而取家人子名為長公主妻單于使劉敬往結和親約

孝惠帝時單于嘗為書嫚呂后不遜呂后大怒召諸將議之上將軍樊噲曰臣願得十萬衆橫行匈奴中諸將皆阿呂后意曰然中郎將季布曰樊噲可斬也夫高帝將兵四十餘萬衆困於平城今噲奈何以十萬衆橫行

匈奴中面欺且秦以事於邊陳勝等起于今創痍未瘳
噲又面諛欲搖動天下是時殿上皆恐太后罷朝遂不
復議擊匈奴事

武帝元光元年主父偃西入關見衛將軍衛將軍數言
上上不省資用乏留久諸侯賓客多厭之偃乃上書關
下朝奏暮召入見所言九事其八事為律令一事諫伐
匈奴曰臣聞明主不惡切諫以博觀忠臣不避重誅以
直諫是故事無遺策而功流萬世今臣不敢隱忠避死

以效愚計願陛下幸赦而少察之司馬法曰國雖大好
戰必亡天下雖平忘戰必危天下既平天子大愷春蒐
秋獮諸侯春振旅秋治兵所以不忘戰也且怒者逆德
也兵者凶器也爭者末節也古之人君一怒必伏尸流
血故聖王重行之夫務戰勝窮武事未有不悔者也昔
秦皇帝任戰勝之威蠶食天下并吞戰國海內為一功
齊三代務勝不休欲攻匈奴李斯諫曰不可夫匈奴無
城郭之居委積之守遷徙靡常難得而制輕兵深入糧

食必絕運糧以行重不及事得其地不足以為利得其民不可調而守也勝必棄之非民父母靡敵中國甘心匈奴非完計也秦皇帝不聽遂使蒙恬將兵而禦邊卻地千里以河為境地固澤鹵不生五穀然後發天下丁男以守北河暴兵露師十有餘年死者不可勝數終不能踰河而北是豈人衆之不足兵革之不備哉其勢不可也又使天下飛芻輓粟起於黃腫琅邪負海之郡轉輸北河率三十鍾而致一石男子疾耕不足於糧餉女

子紡績不足於帷幕百姓靡敝孤寡老弱不能相養道死者相望蓋天下始叛也及至高皇帝定天下畧地於邊聞匈奴聚代谷之外而欲擊之御史成諫曰不可夫匈奴烏合而星散從之如搏景今以陛下盛德攻匈奴臣竊危之高帝不聽遂至代谷果有平城之圍高帝悔之乃使劉敬往結和親然後天下亡干戈之事故兵法曰興師十萬日費千金秦常積衆數十萬人雖有覆軍殺將係虜單于適足以結怨深讎不足以償天下之費

夫匈奴行盜侵毆所以為業天性固然上自虞夏殷周
固不程督度外置之不比華人夫不上觀虞夏殷周之
統而下循近世之失此臣之所以大恐百姓所以疾苦
也且夫兵久則變生事苦則慮易使邊境之民靡敝愁
苦將吏相疑而外市故尉佗章邯得成其私而秦政不
行權分二子此得失之效也故周書曰安危在出令存
亡在所用願陛下熟計之而加察焉書奏上廼拜偃為
郎中

五年番陽令唐蒙風曉南越南越食蒙以蒟醬問所從來曰道西北牂柯江牂柯江廣數里出番禺城下蒙歸問蜀賈人賈人曰獨蜀出蒟醬多持蒟出市夜郎夜郎臨牂柯江江廣百餘步南越以財物役屬之然亦不能臣使也蒙乃上書曰南越王名為外臣實一州主也今以長沙豫章往水道多絕竊聞夜郎精兵可十餘萬浮船牂柯出其不意此制越一奇也請通夜郎道為置吏上乃拜蒙為中郎將

元狩元年博望侯張騫自月氏還具為天子言西域諸國風俗大宛在漢正西可萬里其俗土著耕田多善馬有城郭室屋其東北則烏孫東則于寘于寘之西則水皆西流注西海其東水東流注鹽澤鹽澤潛行地下其南則河源出焉鹽澤去長安可五千里匈奴右方居鹽澤以東至隴西長城南接羌隔漢道焉烏孫康居奄蔡大月氏皆行國隨畜牧與匈奴同俗大夏在大宛西南與大宛同俗臣在大夏時見邛竹杖蜀布問安得此曰

市之身毒身毒在大夏東南可數千里其俗土著與大夏同度大夏去漢萬二千里居漢西南今身毒又居大夏東南從羌中險少北則為匈奴所得從蜀宜徑又無寇天子既聞諸國多奇物而兵弱貴漢財物誠得而以義屬之則廣地萬里重九譯致殊俗威德徧於四海帝欣然以騫言為然乃令騫因蜀犍為發間使四道並出求身毒國各行一二千里其北閉氏徠南閉崙昆明殺畧漢使終莫得通於是始通滇國乃復事西南夷

元鼎二年騫又建言烏孫王昆莫本為匈奴臣後兵稍
彊不肯復朝事匈奴攻不勝而遠之今以厚幣招
以益東居故渾邪之地則是斷匈奴右臂也既連烏孫
自其西大夏之屬皆可招來而為外臣上以為然拜騫
為中郎將齎金幣帛直數千巨萬至烏孫久之不能得
其要領因分遣副使使大宛康居大月氏大夏安息身
毒于滇及諸旁國烏孫送騫還使數十人馬數十疋隨
騫報謝是歲騫還到後所遣使通大夏之屬皆頗與其

人俱來於是西域始通於漢矣

元狩中匈奴渾邪王率衆來降漢發車二萬乘縣官無錢從民貫馬民或匿馬馬不具上怒欲斬長安令汲黯曰長安令無罪獨斬黯民乃肯出馬且匈奴畔其主而降漢漢徐以縣次傳之何至令天下騷動罷弊中國而事異域之人乎上默然及渾邪至賈人與市者坐當死者五百餘人黯請間見高門曰夫匈奴攻當路塞絕和親中國興兵誅之死傷者不可勝計而費以巨萬百

數臣愚以為陛下得邊人皆以為奴婢以賜從軍死事者家所鹵獲因予之以謝天下之苦塞百姓之心今縱不能渾邪率數萬之衆來降虛府庫賞賜發良民侍養譬若奉驕子愚民安知市買長安中物而文吏繩以為關出財物于邊關乎陛下縱不能得匈奴之資以謝天下又以微文殺無知者五百餘人是所謂庇其葉而傷其枝者也臣竊為陛下不取也上默然不許曰吾久不聞汲黯之言今又復妄發矣

武帝時匈奴求和親羣臣議前博士狄山曰和親使上問其便山曰兵凶器未易數動高帝欲伐匈奴大困平城乃遂結和親孝惠高后時天下安樂及文帝欲事匈奴北邊蕭然苦兵孝景時吳楚七國反景帝往來東宮間天下寒心數月吳楚已破竟景帝不言兵天下富實今自陛下興兵擊匈奴中國已空虛邊大困貧由是觀之不如和親

宣帝五鳳元年匈奴亂五單于爭立漢議者多曰匈奴

為害日久可因其壞亂舉兵滅之御史大夫蕭望之曰
春秋晉士匄帥師侵齊聞齊侯卒引師而還君子大其
不伐喪以其恩足以服孝子誼足以動諸侯前單于慕
化嚮善請求和親未終奉約不幸為賊臣所殺今而伐
之是乘亂而幸災也不以義動兵恐勞而無功宜遣使
弔問輔其微弱救其災患四裔聞之咸貴中國之仁義
如遂蒙恩復其位必稱臣服從此德之盛也上從其議
甘露二年初匈奴呼韓邪單于來朝詔公卿議其儀丞

相黃霸御史大夫于定國議曰聖王之制施德行禮先
京師而後諸夏先諸夏而後遠人詩云率履不越遂視
既發相土烈烈海外有截陛下聖德充塞天地光被四
表匈奴單于鄉風慕化奉珍朝賀自古未之有也其禮
儀宜如諸侯王位次在下望之以為單于非正朔所加
故稱敵國宜待以不臣之禮位在諸侯王上外裔稽首
稱藩中國讓而不臣此則羈縻之誼謙亨之福也書曰
戎狄荒服言其來荒忽亡常如使匈奴後嗣卒有沅離

竄伏闕於朝享不為畔臣信讓行乎蠻貉福祚流于亡
窮萬世之長策也天子采之

元帝建昭三年郅支單于叛逆未服甘延壽陳湯上疏
曰臣聞天下之大義當混為一昔有唐虞今有強漢匈
奴呼韓邪單于已稱北藩唯郅支單于叛逆未服其辜
大夏之西以為強漢不能臣也郅支單于慘毒行於民
大惡通於天臣延壽臣湯將義兵行天誅賴陛下神靈
陰陽並應天氣精明陷陳克敵斬郅支首及名王以下

宜縣頭豪街蠻夷邸間以示萬里明犯強漢者雖遠必誅事下有司丞相匡衡御史大夫繁延壽以為鄧支及名王首更歷諸國蠻夷莫不聞知月令春掩骼埋胔之時宜勿縣車騎將軍許嘉右將軍王商以為春秋夾谷之會優施笑君孔子誅之方盛夏首足異門而出宜縣十日廼埋之有詔將軍議是

成帝元延二年康居遣子侍漢貢獻然自以絕遠獨驕嫚不肯與諸國相望都護郭舜數上言本匈奴盛時非

以兼有烏孫康居故也及其稱臣妾非以失二國也漢
雖皆受其質子然三國內相輸遺交通如故亦相候伺
見便則發合不能相親信離不能相臣役以今言之結
配烏孫竟未有益反為中國生事然烏孫既結在前今
與匈奴俱稱臣義不可拒而康居驕黠訖不肯拜使者
都護更至其國坐之烏孫諸使下王及貴人先飲食已
乃飲啗都護吏故為無所省以夸旁國以此度之何故遣
子入侍其欲賈市為好辭之詐也匈奴百蠻大國今事

漢甚備聞康居不拜且使單于有自下之意宜歸其侍
子絕勿復使以章漢家不通無禮之國敦煌酒泉小郡
及南道八國給使者往來人馬驢索駝食皆苦之空罷
耗所過送迎驕黠絕遠之國非至計也

河平元年單于遣右臯林王伊邪莫演等奉獻朝正月
伊邪莫演言欲降即不受我我自殺終不敢還歸使者
以聞下公卿議議者或言宜如故事受其降光祿大夫
谷永議郎杜欽以為漢興匈奴數為邊害故設金爵之

賞以待降者令單于詘禮稱臣列為北藩遣使朝賀無
有二心漢家接之宜異於往時今既享單于聘貢之質
而更受其逋逃之臣是貪一夫之得而失一國之心擁
有罪之臣而絕慕義之君也假令單于初立欲委身中
國未知利害私使伊邪莫演詐降以卜吉凶受之虧德
沮善令單于自疏不親邊吏或者設為反間欲因而生
隙受之適合其策使得歸曲而直責歸曲於漢而以此
直義來責也此
誠邊境安危之原師旅動靜之首不可不詳也不如勿

受以昭日月之信抑詐諉之謀懷附親之心便對奏天子從之遣中郎將王舜往問狀伊邪莫演曰我病狂妄言耳遣去歸到官位如故不肯令見漢使

哀帝建平四年單于上書願朝五年時哀帝被疾或言匈奴從上游來厭人自黃龍竟寧時單于朝中國輒有大故上由是難之以問公卿亦以為虛費府帑可且勿許單于使辭去未發黃門郎楊雄上書諫曰臣聞六經之治貴於未亂兵家之勝貴於未戰二者皆微然而大

事之本不可不察也。今單于上書求朝，國家不許而辭之。臣愚以為漢與匈奴從此隙矣。匈奴本北地之主，五帝之所不能臣，三王之所不能制，其不可使隙甚明。臣不敢遠稱，請引秦以來明之。以秦始皇之彊，蒙恬之威，帶甲四十餘萬，然不敢窺西河，迺築長城以界之。會漢初興，以高祖之威靈，三十萬衆困於平城，士或七日不食，時奇譎之士石畫之，臣甚衆。石言堅固如石也。畫計策也。卒其所脫者，世莫得而言也。卒終也。莫得而言，謂自免之計，其事醜惡，故不傳。又高

皇后嘗忿匈奴羣臣庭議樊噲請以十萬衆橫行匈奴
中季布曰噲可斬也妄阿順指於是大臣權書遺之然
後匈奴之結解中國之憂平及孝文時匈奴侵暴北邊
候騎至雍甘泉京師大駭發三將軍屯細柳棘門霸上
以備之數月廼罷孝武即位設馬邑之權欲誘匈奴使
韓安國將三十萬衆徼於便陁徼要也陁古地字匈奴覺之而
去徒費財勞師一人不可得見況單于之面乎其後深
惟社稷之計規恢萬載之策廼大興師數十萬使衛青

霍去病操兵前後十餘年於是浮西河絕大幕破寘顏
襲王庭窮極其地追奔逐北封狼居胥山禪於姑衍以
臨瀚海虜名王貴人以百數自是之後匈奴震怖益求
和親然而未肯稱臣也且夫前世豈樂傾無量之費役
無罪之人快心於狼望之北哉以為不壹勞者不久佚
不暫費者不永寧是以忍百萬之師以摧餓虎之喙運
府庫之財填廬山之壑而不悔也至本始之初匈奴有
桀心欲掠烏孫侵公主廼發五將之師十五萬騎獵其

南而長羅侯以烏孫五萬騎震其西皆至質而還

質信也謂

所期處

時鮮有所獲徒奮揚威武明漢兵若風雷耳雖空

行空反尚誅兩將軍故北敵不服中國未得高枕安寢

也逮至元康神爵之間大化神明鴻恩博洽而匈奴內

亂五單于爭立日逐呼韓邪攜國歸死扶伏稱臣

伏蒲北反

然尚羈縻之計不顯制

顯與專同專制謂以為臣妾也

自此之後欲朝

者不距不欲者不彊何者外國天性忿鷙形容魁健負力怙氣難化以善易隸以惡其彊難詘其和難得故未

服之時勞師遠攻傾國殫貨伏尸流血破堅拔敵如彼

之難也既服之後慰薦撫循交接賂遺威儀俯仰如此

之備也往時嘗屠大宛之城蹈烏桓之壘探姑繒之壁

姑繒謂西
南夷種也

藉蕩姐之場

羌屬也藉猶
蹈也姐音紫

艾朝鮮之旃拔兩

越之旗

艾讀曰
刈絕也

近不過旬月之役遠不離二時之勞

離歷

也三月
為一時

固已犁其庭掃其閭

犁耕也

郡縣而置之雲徹席

卷後無餘蓄惟北敵為不然真中國之堅敵也三垂比

之懸矣前世重之茲甚未易可輕也今單于歸義懷款

誠之心欲離其庭陳見於前此乃上世之遺策神靈之所想望國家雖費不得已者也柰何距以來厭之辭䟽以無日之期消往昔之恩開將來之隙夫歟而隙之使

有恨心負前言緣往辭

言單于因緣往昔和好之辭以怨漢也

歸怨於漢

因以自絕終無北面之心威之不可諭之不能焉得不為大憂乎夫明者視於無形聰者聽於無聲誠先於未然即蒙恬樊噲不復施棘門細柳不復備馬邑之策安所設衛霍之功何得用五將之威安所震不然壹有隙

之後雖智者勞心於內辯者較擊於外

較擊言使車交馳其較相擊也

猶不若未然之時也且往者圖西域制車師置城都護三十六國費歲以大萬計也者豈為康居烏孫能踰白龍堆而寇西邊哉廼以制匈奴也夫百年勞之一日失之費十而愛一臣竊為國不安也惟陛下少留意於未亂未戰以遏邊萌之禍書奏天子寤焉召還匈奴使者更報單于書而許之

新莽建國四年烏孫大小昆彌遣使入貢莽以烏孫國

人多親附小昆彌欲得烏孫心乃遣使者引小昆彌使坐大昆彌使上師友祭酒滿昌劾奏使者曰外國以中國有禮義故屈而服從大昆彌君也今序臣使於君使之上非所以有外國也奉使大不敬莽怒貶昌官

漢光武皇帝建武十一年先零諸羌數萬人屯聚寇鈔距浩疊隘馬成與馬援深入討擊大破之徙降羌致天水隴西扶風是時朝臣以金城破羌之西塗遠多寇議欲棄之馬援上言破羌以西城多完牢易可依固其田

土肥壤灌溉流通如今羌在湟中則為害不休不可棄也帝從之民歸者三千餘口援為長吏繕城郭起塢候開溝洫勸以耕牧郡中樂業又招撫塞外氐羌皆來降附援奏復其侯王君長帝悉從之乃罷馬成軍

十七年莎車王賢復遣使奉獻請都護帝賜賢西域都護印綬及車旗黃金錦繡敦煌太守裴遵上言異域不可假以大權又令諸國失望詔書收還都護印綬更賜賢以漢大將軍印綬其使不肯易遵迫奪之賢由是始

恨而猶詐稱大都護移書諸國悉服屬焉

二十四年匈奴南邊八部立日逐王比為南單于款五
原塞內附願永為藩蔽扞禦北邊事下公卿議者皆以
為天下初定中國空虛不可許五官中郎將耿國獨以
為如孝宣故事受之令東扞鮮卑北拒匈奴率屬四夷
完復邊郡帝從之於是分為南北單于

二十七年北單于遣使詣武威求和親天子召公卿廷
議不決皇太子言曰南單于新附北部懼於見伐故傾

耳而聽爭欲歸義耳今未能出兵而反交通北部臣恐南單于將有志北部降者且不復來矣帝然之告武威太守勿受其使

二十八年北單于復遣使詣闕貢馬及裘更乞和親并請音樂又求率西域諸國使客與俱獻見帝下三府議酬答之宜司徒掾班彪奏曰臣聞孝宣皇帝勅邊守尉曰匈奴大國多變詐交接得其情則却敵折衝應對入其數則反為輕欺今北匈奴見南單于來附懼謀其國

故數乞和親又遠驅牛馬與漢合市重遣名王多所貢獻斯皆外示富彊以相欺誕也臣見其獻益重知其國益虛歸親愈數為懼愈多然今既未獲助南則亦不宜絕北羈縻之義禮無不答謂可頗加賞賜畧與所獻相當明加曉告以前世呼韓邪郅支行事報答之辭令必有適今立葉草并上曰單于不忘漢恩追念先祖舊約欲修和親以輔身安國計議甚高為單于嘉之往者匈奴數有乖亂呼韓邪郅支自相讎隙蒙孝宣皇帝垂恩

救護故各遣侍子稱藩保塞其後郅支忿戾自絕皇澤而呼韓附親忠孝彌著及漢滅郅支遂保國傳嗣子孫相繼今南單于攜衆向南款塞歸命自以呼韓嫡長次第當立而侵奪失職猜疑相背數請兵將歸埽北庭策謀紛紜無所不至惟念斯言不可獨聽又以北單于比年貢獻欲脩和親故拒而未許將以成單于忠孝之義漢秉威信總率萬國日月所照皆為臣妾殊俗百蠻義無親疎服順者褒賞畔逆者誅罰善惡之効呼韓郅支

是也令單于欲脩和親款誠已達何嫌而欲率西域諸國俱來獻見西域國屬匈奴與屬漢何異單于數連兵亂國內虛耗貢物裁以通禮何必獻馬表今齋雜繒五百匹弓韃韞丸一矢四發遣遺單于又賜獻馬左骨都侯右谷蠡王雜繒各四百匹斬馬劍各一單于前言先帝時所賜呼韓邪等琵琶篳篥皆敗願復裁賜念單于國尚未安方厲武節以戰攻為務等琵琶之用不如良弓利劍故未以齋朕不愛小物於單于便宜所欲遣驛以聞

帝悉納從之

明帝永平中益州刺史梁國朱輔好立功名慷慨有大略在州數歲宣示漢德威懷遠裔自汶山以西前世所不至正朔所未加白狼槃木唐菰等百餘國戶百三十餘萬口六百萬以上舉種奉貢稱為臣僕輔上疏曰臣聞詩云彼徂矣岐有夷之行傳曰岐道雖僻而人不遠詩人誦詠以為符驗今白狼王唐菰等慕化歸義作詩三章路經邛來大山零高坂峭危峻險百倍岐道雖負

老幼若歸慈母遠裔之語辭意難正歸順之念誠懇可嘉有捷為郡掾田恭與之習狎頗曉其言臣輒令訊其風俗譯其辭語今遣從事史李陵與恭護送詣闕并上其樂詩昔在聖帝舞四裔之樂今之所上庶備其一帝嘉之事下史官錄其歌焉遠裔樂德歌詩曰大漢是治與天合意吏譯平端不從我來聞風向化可見奇異多賜贈布甘美酒食昌樂肉飛屈申悉備蠻夷貧薄無所報嗣願主長壽子孫昌熾遠裔慕德歌詩曰蠻夷所處

日入之部慕義向化歸日出主聖德深恩與人富厚冬
多霜雪夏多和雨寒溫時適部人多有涉危歷險不遠
萬里去俗歸德心歸慈母遠裔懷德歌曰荒服之外土
地境埏食肉衣皮不見鹽穀吏譯傳風大漢安樂攜負
歸仁觸冒險阮高山岐峻緣崖磻石木薄發家百宿到
洛父子同賜懷抱匹帛傳告種人長願臣僕

八年帝遣鄭衆持節使匈奴衆至北庭敵欲令拜衆不
為屈單于大怒圍守閉之不與水火欲脅服衆衆拔刀

自誓單于恐而止乃更發使隨衆還京師朝議復欲遣使報之衆上疏諫曰臣伏聞北單于所以要致漢使者欲以離南單于之衆堅三十六國之心也又嘗揚漢和親誇示鄰敵令西域欲歸化者局足狐疑懷土之人絕望中國耳漢使既到便偃蹇自信若復遣之敵必自謂得謀具羣臣駁議者不敢復言如是南庭動搖烏桓有離心矣南單于久居漢地其知形勢萬分離析旋為邊害今幸有度遼之衆揚威北垂雖勿報答不敢為患帝

不從復遣衆衆因上言臣前奉使不為匈奴拜單于恚恨故遣兵圍臣今復銜命必見陵折臣誠不忍持大漢節對敵人獨拜如令匈奴遂能服臣將有損大漢之彊帝不聽衆不得已既行在路連上書固爭之詔切責衆追還繫廷尉會赦歸家其後帝見匈奴來者問衆與單于爭禮之狀皆言匈奴中傳衆意氣壯勇雖蘇武不過乃復召衆為軍司馬

章帝建初五年軍司馬班超率疏勒康居于寘拘彌兵

一萬人攻姑墨石城破之斬首七百級超欲因此臣平
諸國乃上疏請兵曰臣竊見先帝欲開西域故北擊匈
奴西使外國鄯善于寘即時向化今拘彌莎車疏勒月
氏烏孫康居復願歸附欲共并力破滅龜茲平通漢道
若得龜茲則西域未服者百分之一耳臣伏自惟念卒
伍小吏實願從谷吉效命絕域庶幾張騫棄身曠野昔
魏絳列國大夫尚能和輯諸戎況臣奉大漢之威而無
鈎刀一割之用乎前世議者皆曰取三十六國號為斷

匈奴右臂今西域諸國自日之所入莫不向化大小欣
欣貢奉不絕唯焉耆龜茲獨未服從臣前與官屬三十
六人奉使絕域備遭艱厄自孤守疏勒於今五載異域
情數臣頗識之問其城郭小大皆言倚漢與依天等以
是效之則葱嶺可通葱嶺通則龜茲可伐今宜拜龜茲
侍子白霸為其國王以少騎數百送之與諸國連兵歲
月之間龜茲可禽以外國攻外國計之善者也臣見莎
車疏勒田地肥廣草木饒衍不比敦煌鄯善間也兵可

不費中國而糧食自足且姑墨溫宿二王特為龜茲所
置既非其種更相厭苦其執必有降反若二國來降則
龜茲自破願下臣章參考行事誠有萬分死復何恨臣
超區區特蒙神靈竊冀未便僵仆目見西域平定陛下
舉萬年之觴薦勲祖廟布大喜於天下書奏帝知其功
可成議欲給兵平陵人徐幹素與超同至上疏願奮身
佐超五年遂以幹為假司馬將弛刑及義從千人就超
先是莎車以為漢兵不出遂降於龜茲而疏勒都尉番

辰亦復反叛會徐幹適至超遂與幹擊番辰大破之斬首千餘級多獲生口超既破番辰欲進攻龜茲以烏孫兵彊宜因其力乃上言烏孫大國控弦十萬故武帝妻以公主至孝宣皇帝卒得其用今可遣使招慰與合力帝納之

章帝時北單于遣使貢獻求欲和親詔問羣僚議者或以為匈奴變詐之國無內向之心徒以畏漢威靈逼憚南部故希望報命以安其離叛今若遣使恐失南部親

附之歡而成北敵猜詐之計不可玄武司馬班固議曰
竊自惟思漢興已來曠世歷年兵纏邊境尤事匈奴綏
御之方其塗不一或脩文以和之或用武以征之或卑
下以就之或臣服而致之雖屈申無常所因時異然未
有拒絕棄放不與交接者也故自建武之世復修舊典
數出重使前後相繼至於其末始乃暫絕永平八年復
議通之而廷爭連日異同紛回多執其難少言其易先
帝聖德遠覽瞻前顧後遂復出使事同前世以此而推

未有一世闕而不脩者也今烏桓就闕稽首譯官康居
月氏自遠而至匈奴離析名王來降三方歸服不以兵
威此誠國家通於神明自然之徵也臣愚以為宜依故
事復遣使者上可繼五鳳甘露致遠人之會下不失建
武永平羈縻之義敵再來然後一往既明中國主在忠
信且知聖朝禮義有常豈同逆詐示猶狐其善意乎絕
之未知其利通之不聞其害設後北敵稍彊能為風塵
方復求為交通將何所及不若因今施惠為策近長

元和二年武威太守孟雲上書北敵既已和親而南部復往抄掠北單于謂漢欺之謀欲犯邊宜還其生口以安慰之詔百官議朝堂公卿皆言敵人譎詐求欲無厭既得生口當復妄自誇大不可開許太僕袁安獨曰北敵遣使奉獻和親有得邊生口者輒以歸漢此明其畏威而非先違約也雲以大臣典邊不宜負信於敵人還之足示中國優貸而使邊人得安誠便司徒桓虞改議從安太尉鄭弘司空第五倫皆恨之弘因大言激勵虞

曰諸言當還生口者皆為不忠虞廷叱之倫及大鴻臚
韋彪各作色變容司隸校尉舉奏安等皆上印綬謝帝
詔報曰久議沈滯各有所志蓋事以議從策由衆定閭
閻衍衍得禮之容寢嘿抑心更非朝廷之福君何尤而
深謝其各冠履帝竟從安議許之乃下詔曰昔獫狁
粥之敵中國其所由來尚矣往者雖有和親之名終無
絲髮之效境埆之人屢嬰塗炭父戰于前子死於後弱
女乘於亭障孤兒號於道路老母寡妻設虛祭飲泣淚

想望歸魂於沙漠之表豈不哀哉傳曰江海所以能長百川者以其下之也少加屈下尚何足病況今與匈奴君臣分定辭順約明貢獻累至豈宜違信自受其曲其勅度遼及領中郎將龐奮倍崖南部所得生口以還北敵其南部斬首獲生計功受賞如常科

章和二年鮮卑擊破北匈奴而南單于乘此請兵北伐因欲還歸舊庭時竇太后臨朝議欲從之尚書宋意上疏曰夫北敵之隔遠中國幽處北極界以沙漠簡賤禮

樂無有上下彊者為雄弱即屈服自漢興以來征伐數
矣其所剋獲曾不補害光武皇帝躬服金革之難深昭
天地之明故因其來降羈縻畜養邊人得生勞役休息
於茲四十餘年矣今鮮卑奉順斬獲萬數中國坐享大
功而百姓不知其勞漢興功烈於斯為盛所以然者敵
自相攻無損漢兵者也臣察鮮卑侵伐匈奴正是利其
抄掠及歸功聖朝實由貪得重賞今若聽南部還都北
庭則不得不禁制鮮卑鮮卑外失暴掠之願內無功勞

之賞懷忿思逞必為邊患今北敵西遁請求和親宜因其歸附以為外扞魏魏之業無以過此若引兵費賦以順南部則坐失上畧去安即危矣誠不可許會南單于竟不北徙遷司隸校尉

漢和帝永元四年北單于既亡其弟於除鞬自立遣使款塞竇憲請立為單于置中郎將領護如南單于故事事下公卿議袁安任隗以為光武招懷南部非謂可永安內地止以權時之筭可得扞禦北敵故也今宜令南

單于反北庭領降衆無緣復更立於除鞬以增國費安
又獨上封事曰臣聞功有難圖不可豫見事有易斷較
然不疑伏惟光武皇帝本所以立南單于者欲安南定
北之策也恩德甚備故匈奴遂分邊境無患孝明皇帝
奉承先意不敢失墜赫然命將爰伐塞北至乎章和之
初降者十餘萬人議者欲置之瀕塞東至遼東太尉宋
由光祿勳耿秉皆以為失南單于心不可先帝從之陞
下奉承洪業大開疆宇大將軍遠師討伐席卷北庭此

誠宣明祖宗宗立弘勲者也宜審其終以成厥初伏念南單于屯先父舉衆歸德自蒙恩以來四十餘年三帝積累以遺陛下陛下深宜遵述先志成就其業況屯首唱大謀空盡北敵輟而弗圖更立新降以一朝之計違三世之規失信於所養建立於無功由秉實知奮議而欲背棄先恩夫言行君子之樞機賞罰理國之綱紀論語曰言忠信行篤敬雖蠻貊行焉今若失信於一屯則百蠻不敢復保誓矣又烏桓鮮卑新殺北單于凡人之情咸

畏仇讎今立其弟則二國懷怨兵食可廢信不可去且
漢故事供給南單于費直歲一億九十餘萬西域歲七
千四百八十萬合北庭弥遠其費過倍是乃空盡天下
而非建策之要也詔下其議安又與憲更相難折憲險
急負執言辭驕訐至詆毀安稱光武誅韓歆戴涉故事
安終不移憲竟立匈奴降者右鹿蠡王於除鞬為單于
後遂反叛卒如安策

永元六年時南單于與中郎將杜崇不相平迺上書告

崇宗諷西河太守令斷單于章無由自聞而崇因與行
度遼將軍朱徽上言南單于安國踈遠故部親近新降
欲殺左賢王師子及左臺且渠劉利等又右部降者謀
共迫脅安國起兵背畔請西河上郡安定為之儆備帝
下公卿議皆以為蠻夷反覆雖難測知然大兵聚會必
未敢動搖今宜遣有方畧使者之單于庭與杜崇朱徽
及西河太守并力觀其動靜如無他變可令崇等就安
國會其左右大臣責其部衆橫暴為邊害者共平罪誅

若不從命令為權時方畧事畢之後裁行客賜亦足以
威示百蠻帝從之

安帝永寧元年北匈奴率車師後王軍就共殺索班擊
走前王畧有北道曹宗請出兵擊匈奴以報之因復取
西域公卿皆以為宜閉玉門闕太后聞軍司馬班勇有
父風召問之勇上議曰昔孝武皇帝開通西域論者以
為奪單于府藏斷其右臂光武中興未遑外事故匈奴
驅率諸國河西城門晝閉孝明皇帝深惟廟策命將出

征然後匈奴遠遁邊境得安間者羌亂西域復絕北敵
遂遣責諸國逋租高其價直嚴以期會鄯善車師皆懷
憤怒思樂事漢其路無從今曹宗徒欲報雪匈奴而不
尋出兵故事要功荒外萬無一成兵連禍結悔無所及
況今府庫未充師無後繼臣愚以為不可許也宜於敦
煌復置營兵三百人及護西域副校尉遣長吏將五百
人屯樓蘭西當焉耆龜茲逕路南疆鄯善于寘心膽北
扞匈奴東近敦煌既為諸部節度又禁漢人侵擾如此

誠便公卿難曰前所以棄西域者以其無益而難供也
今欲通之班將能保北敵不為邊害乎勇對曰今置州
牧以禁盜賊若州牧能保盜賊不起者臣亦願要斬保
匈奴之不為邊害也今通西域則敵勢必弱為患微矣
孰與歸其府藏續其右臂哉若棄而不立則西域望絕
屈就北敵恐河西城門必須復有晝閉之儆矣今不廓
開朝廷之德而拘屯戍之費豈安邊久長之策哉難者
又曰西域遣使求索無厭一旦為匈奴所迫當復求救

則為役大矣。勇對曰：今設以西域歸匈奴，而使其恩德大，漢不為鈔盜則可矣。如其不然，則是富仇讎之財，增強敵之勢。且西域來者，不過廩食。今若拒絕，勢歸北屬。敵國并力以寇，并涼則中國之費不止十億。置之誠便。於是從勇議，復營兵，置副校尉居敦煌。雖以羈縻西域，然亦未能出屯。其後匈奴果數與車師入寇河西，大被其害。

順帝永建四年，虞詡言：安定北地上郡山川險阨，沃野

千里土宜畜牧水可溉漕頃遭羌亂郡縣兵荒一十餘年矣棄沃壤之饒捐自然之財不可謂利離河山之阻守無險之處難以爲固今三郡未復園陵單外而公卿異懦計費不圖其安宜開聖聽考行所長從之使謁者督徙者各歸本縣繕城郭置候驛又浚渠屯田省費歲一億許遂令諸郡儲粟周數年

永和元年武陵蠻反初太守上書以蠻夷率服可比漢人增其租賦議者皆以爲可尚書令虞詡獨奏曰自古

聖王不臣異俗非德不能及威不能加知其天性貪婪
難率以禮是故羈縻而綏撫之附則受而不逆叛則弃
而不追先帝舊典貢稅多少所由來久矣今猥增之必
有怨叛計其所得不償所費必有後悔帝不從其冬澧
中淩中蠻果爭貢布非舊約舉種反叛

晉惠帝時關隴屢為氐羌所擾山陰令江統深惟四裔
侵亂宜杜其萌乃作徙戎論其辭曰夫東西南北謂之
四海九服之制地在要荒春秋之義內諸夏而外四裔

以其言語不通，幣幣不同，別有法俗，各為種類，或居絕域之外，山河之表，崎嶇川谷，阻險之地，與中國壤斷土隔，不相侵涉，賦役不及，正朔不加，故曰天子有道，守在四夷。禹平九土，而西戎即叙，其風氣剛勁，習俗強悍，四裔之中，西北為甚，弱則畏服，彊則侵叛，雖有聖賢之世，大德之君，咸未能以通化率導，而以恩德柔懷也。當其彊也，以殷之高宗而憊於鬼方，有周文王而患昆夷，獫狁高祖困於白登，孝文軍於霸上，及具弱也，周公來九

譯之貢中宗納單于之朝以元成之微而猶四裔賓服
此其已然之效也故匈奴求守邊塞而侯應陳其不可
單于屈膝未央望之議以不臣是以有道之君牧四裔
也惟以待之有備禦之有常雖稽顙執贄而邊城不弛
固守為寇賊彊暴而兵甲不加遠征期令境內獲安疆
場不侵而已及至周室失統諸侯專征以大蕪小轉相
殘滅封疆不固而利害異心外域乘間得入中國或招
誘安撫以為已用故申繒之禍顛覆宗周襄公要秦遽

興姜戎當春秋時義渠大荔居秦晉之域陸渾陰戎處
伊洛之間鄭瞞之屬害及濟東侵入齊宋陵虐邢衛南
北二陸交侵中國不絕若綫齊桓攘之存亡繼絕北
伐山戎以開燕路故仲尼稱管仲之力加左衽之功逮
至春秋之末戰國方盛楚吞蠻氏晉剪陸渾趙武龐服
開榆中之地秦雄咸陽滅義渠之等始皇之并天下也
南兼百越北走匈奴五嶺長城戎卒億計雖師役煩殷
寇賊橫暴然一世之功戎人奔却當時中國無復四裔

也漢興而都長安關中之郡號曰三輔禹貢雍州宗周
豐鎬之舊也及至王莽之敗赤眉因之西都荒毀百姓
流亡建武中以馬援領隴西太守討叛羌徙其餘種於
關中居馮翊河東空地而與華人雜處數歲之後族類
蕃息既恃其肥彊且苦漢人侵之永初之元騎都尉王
弘使西域發調羌氏以為行衛於是羣羌奔駭互相扇
動二州之戎一時俱發覆沒將守屠破城邑鄧騭之征
棄甲委兵輿尸喪師前後相繼諸戎遂熾至於南入蜀

漢東掠趙魏唐突軹關侵及河內及遣北軍中候朱寵
將五營士於孟津距羗十年之中中外俱斃任尚馬賢
僅得克之此所以為害深重累年不定者雖由禦者之
無方將非其才亦豈不以寇發心腹害起肘腋疾篤難
療瘡大遲愈之故哉自此之後餘燼不盡小有際會輒
復侵叛馬賢狃怙終於覆敗段熲臨衝自西徂東雍州
之戎常為國患中世之寇惟此為大漢末之亂關中殘
滅魏興之初與蜀分隔疆場之戎一彼一此魏武皇帝

令將軍夏侯妙才討叛氐阿貴千萬等後因拔棄漢中
遂徙武都之種於秦川欲以弱寇疆國扞禦蜀虜此蓋
權宜之計一時之勢非所以為萬世之利也今者當之
已受其弊矣夫關中土沃物豐厥土上上加以涇渭之
流溉其鵠鹵鄭國白渠灌浸相通黍稷之饒畝彌一鍾
百姓謠詠其殷實帝王之都每以為居未聞戎人宜在
此土也非我族類其心必異猜疑靡定不與我同而因
其衰弊遷之畿服士庶翫習侮其輕弱使其怨恨之氣

毒於骨髓至於蕃育衆盛則坐生其心以貪悍之性挾
憤怒之氣候隙乘便輒為橫逆而居封域之內無障塞
之隔掩不備之人收散野之積故能為禍滋蔓暴害不
測此必然之勢已驗之事也當今之宜宜及兵威方盛
衆事未罷徙馮翊北地新平安定界內諸羌著先零罕
开析支之地徙扶風始平京兆之氏出還隴右著陰平
武都之界廩其道路之糧令足自致各附本種反其舊
土使屬國撫夷就安集之戎晉不雜並得其所上合往

古即叙之義下為盛世永久之規縱有叛亂之心風塵之警則絕遠中國隔閼山河雖為寇暴所害不廣是以充國子明能以數萬之衆制羣羌之命有征無戰全軍獨剋雖有謀謨深計廟勝遠圖豈不以中外異處戎夏區別要塞易守之故得成其功也哉難者曰方今關中之禍暴兵二載征戍之勞老師十萬水旱之害游饑累荒疫癘之災札瘥天昏凶逆既戮悔惡初附且款且畏咸懷危懼百姓愁苦異人同慮望寧息之有期若枯旱

之思雨露誠宜鎮之以安豫而子方欲作役起徒興功
造事使疲悴之衆徒自猜之寇以無穀之人遷乏食之
徒恐勢盡力屈緒業不卒羗戎離散心不可一前害未
及弭而後變復橫出矣荅曰羗戎狡猾擅相號署攻城
野戰傷害牧守連兵聚衆載離寒暑矣而今異類瓦解
同種土崩老幼繫虜丁壯降散流離衰弊不能相一子
以此等尚挾餘資悔惡反善懷我德惠而來柔附乎將
勢窮道盡智力俱困懼我兵誅以至於此乎曰無有餘

力勢窮道盡故也然則我能制其短長之命而令其進退由己矣夫樂其業者不易事安其居者無遷志方其自疑危懼畏怖促遽故可制以兵威使之左右無違也迨其死亡散流離過未鳩與關中之人戶皆為讎故可遐遷遠處令其心不懷土也夫聖賢之謀事也為之於未有理之於未亂道不著而平德不顯而成其次則能轉禍為福因敗為功值困必濟遇否能通今予遭弊事之終而不圖更制之始愛易轍之勤而得覆車之軌何

哉且關中之人百餘萬口率其少多異族居半處之與
遷必須口實若有窮乏糝粒不繼者故當傾關中之穀
以全其生生之計必無擠於溝壑而不為侵掠之害也
今我遷之傳食而至附其種族自使相贍而秦地之人
得其半穀此為濟行者以廩糧遺居者以積倉寬關中
之逼去盜賊之原除旦夕之損建終年之益若憚暫舉
之小勞而忘永逸之弘策惜日月之煩苦而遺累世之
寇敵非所謂能開物成務創業垂統崇基拓跡謀及子

孫者也并州諸部本實匈奴桀惡之寇也漢宣之世凍餒殘破國內五裂後合為二呼韓邪遂衰弱孤危不能自存依阻塞下委質柔服建武中南單于復求降附遂令入塞居於漠南數世之後亦輒叛戾故何熙梁覲戎車屢征中平中以黃巾賊起發調其兵部衆不從而殺羌渠由是於弥扶羅求助於漢以討其賊仍值世喪亂遂乘釁而作鹵掠趙魏寇至河南建安中又使右賢王去卑誘質呼厨泉聽其部落散居六郡咸熙之際以一

部大彊分為三率泰始之初又增為四於是劉猛內叛
連結外寇近者郝散之變發於穀遠今五部之衆戶至
數萬人口之盛過於西戎然其天性驍勇弓馬便利倍
於氐羌若有不虞風塵之慮則并州之域可為寒心滎
陽句驪本居遼東塞外正始中幽州刺史毋丘儉伐其
叛者徙其餘種始徙之時戶落百數子孫孳息今以千
計數世之後必至殷熾今百姓失職猶或亡叛犬馬肥
充則有噬齧沉於邊鄙能不為變但顧其微弱勢力不

陳耳夫為邦者患不在貧而在不均憂不在寡而在不安以四海之廣士庶之富豈須遠人在內然後取足哉此等皆可申諭發遣還其本域慰彼羈旅懷土之思釋我華夏纖介之憂惠此中國以綏四方德施永世於計為長帝不能用未及十年而劉石構難時服其深識

宋明帝太始七年單于猛叛屯孔邪城武帝遣婁侯何楨持節討之楨素有志畧以猛衆悍非少兵所至乃潛誘猛左部督李恪殺猛於是匈奴震服積年不敢復反

其後稍因忿恨殺害長吏漸為邊患侍御史西河郭欽
上疏曰戎人彊獷歷古為患魏初人寡西北諸郡皆為
戎居今雖服從若百年之後有風塵之警敵騎自平陽
上黨不三日而至孟津北地西河太原馮翊安定上郡盡
為敵庭矣宜及平吳之威謀臣猛將之畧出北地西河
安定復上郡實馮翊於平陽已北諸縣募取死罪徙三
河三魏見士四萬家以充之不致雜處漸徙平陽弘農
魏郡京兆上黨諸部峻四裔出入之防明先王荒服之

制萬世之長策也

齊高皇帝建元元年王與進號左將軍明年遷太常領鄴陽王師仍轉侍中秘書監領驍騎將軍又遷征虜將軍臨川王鎮西長史領南蠻校尉南郡內史與一歲三遷上表固讓南蠻曰今天地初闢萬物載新荆蠻來威巴濮不擾但使遷民樂業有司脩務本府舊州日就殷阜臣昔遊西土較見盈虛無日者戎燼之後瘡毀難復雖復緝以善政未及來蘇今復割撤大府制置偏校崇望不足以助強

語實安能以相弊且資力既分職司增廣衆勞務倍文案滋煩非獨臣見其難竊以為國計非允見許

齊武帝永明中敵遣使求書朝議欲不與丹陽令中書郎王融上疏曰臣側聞僉議疑給敵書如臣愚情切有未喻夫敵包藏禍心匪伊朝夕兇猛難制遷徙靡常逋竄燭幽去來幽朔綿周漢而不悛歷晉宋其踰梗豈有愛敬仁智恭讓廉脩異臣僕之馴心同仇讐之反目設橐秣有儲筋竿足用必以草竊闕燧寇擾邊疆寧容款

塞卑辭承衣請朔陛下務存遵養不時侮亡許其膜拜
之誠納裘之責況復願同文軌僅見款遺思奉聲教方
致猜拒將使舊邑遺逸未知所寘哀敵餘嘒或能自推
一令蔓草難鉏洎流泛酌豈直疥癢輕痼容為心腹重
患抑孫武之言也困則數罰窘則多賞先暴而後畏其
衆者敵之謂乎前中原士庶雖淪懾殊俗至於婚葬之
晨猶巾禱為禮而禁令苛刻動加誅輟于時獯粥初遷
徒衆尚結即心徒怨困懼成逃自其將卒奔離資待銷

關北畏勅蠕西逼南部民背如崩勢絕防斷於是曲從
物情偽竊章服歷年將絕隱蔽無聞既南向而泣者日
夜以覲北顧而辭者江淮相屬凶謀歲窘淺慮無方於
是稽顙郊門問禮求樂若來之以文德賜之以副書漢
家軌儀重臨畿輔司隸傳節復入關河無待八百之師
不期十萬之衆故其提漿佇俟揮戈願倒三秦大同六
漢一統又敵前後奉使不專漢人必介以匈奴備諸覘
獲且設官分職彌見其情抑退舊苗扶任種戚師保則

后族馮晉國摠錄則邽姓直勒渴侯台鼎則邨顏苟仁
端執政則目凌鉗耳至於東都羽儀西京簪帶崔孝伯
程虞蚪久在著作李元和郭季祐止于中書李思沖飾
虜清官游明根泛居顯職今經典遠被詩史北流馮李
之徒必欲遵尚直勒等類居致乖阻何則匈奴以氈騎
為惟牀馳射為糗糧冠方帽則犯沙陵雪服左衽則風
驟鳥逝若革其故常強所不習去其所樂予以所苦必
同艱桎梏等懼冰淵婆娑蹢躅困而不能前矣及夫春

草水生阻散馬之適秋風木落絕驅禽之歡息沸脣於
桑墟別醞乳於冀俗聽韶雅如隴贖臨方丈若爰居馮
李之徒固得志矣敵之為敵其如病何於是風土之思
深愎戾之情動拂衣者連裾抽鋒者比鏃部落爭于下
酋渠危于上我一舉而兼吞下莊之勢必也且棘寶薦
虞晉彊弥盛大鍾出智宿氏以亡帝畧遠乎無思不服
鑒光幸岱匪暮思朝臣請收籍伊瀝茲書復掌猶取之
內府藏之外籙於理有愜即事何損若狂言足採請決

敕施行世祖答曰吾意不異卿今所啓比相見更委悉
事竟不行

齊明皇帝建武初南郡太守孔稚珪以敵連歲南侵征
役不息百姓死傷乃上表曰匈奴為患自古而然雖三
代智勇兩漢權奇算畧之要二塗而已一則鐵馬風馳
奮威沙漠二則輕車出使通驛敵庭推而言之優劣可
覩今之議者咸以丈夫之氣耻居物下況我天威寧可
先屈吳楚勁猛帶甲百萬截彼鯨鯢何往不碎請和示

弱非國計也臣以為敵人異域不與我同得其疆宇不足為利得其徒眾不足為臣唯宜勝之以深權制之以遠竿弘之以大度懷之以遠人豈足肆天下之忿捐蒼生之命發雷電之怒爭蟬蛭之生百戰百勝不足稱雄橫尸千里無益上國而兵連禍結莫或遑息居深負險難與競逐漢高橫威海表窘迫長圍孝文國富刑清事屈陵辱宣帝撫納安靜朔馬不驚光武卑辭厚禮寒山無靄是兩京四主英濟中區輸寶貨以結和遣宗女以

通好長轡遠馭子孫是賴豈不欲戰息民命也唯漢武
籍五世之資承六合之富驕心奢志大事匈奴遂連兵
積歲轉戰千里長驅瀚海飲馬龍城雖斬獲名王屠走
敵騎而漢之棄甲十亡其九故衛霍出關千隊不反貳
師入漢百旅頓降李廣敗於前鋒李陵沒於後陣其餘
奔北不可勝數遂使國儲空懸戶口減半好戰之功其
利安在戰不及和相去何若自西朝不綱東晉遷鼎羣
么沸亂異族交橫荆棘攢於陵廟貔虎咆於宮闈山淵

反覆黔首塗地逼迫崩騰開闢未有是時得失畧不稍
陳近至元嘉多年無事末路不量復挑彊敵遂迺連城
覆徙敵馬飲江青徐州之際草木為人耳建元之初沙
塵犯塞永明之始復結通和十餘年間邊候且息陛下
張天造歷駕日登皇聲雷宇宙勢壓河岳而遠傲殘魂
未屠劒首微么餘喘偷窺外甸烽亭不靜五載於斯昔
歲蠹侵瘰食樊漢今茲虎視浸淫未已興師十萬日費
千金百歲之費寧可貲計陛下何惜匹馬之驛百金之

賂數行之詔誘此凶頑使河塞息肩闕境全命蓄甲養民以觀彼弊我策若行則為不世之福若不從命不過如戰失一隊耳或云遣使不受則為辱命夫以天下為量者不計細耻以四海為任者寧顧小節一城之沒尚不足惜一使不反曾何取慙且我以權取貴得我畧行何嫌其耻所謂尺蠖之屈以求伸也臣不言遣使必得和自有可和之理猶如欲戰不必勝而有可勝之機耳今宜早發大軍廣張兵勢徵犀甲於岷峨命樓船於浦

海使自青徂豫候騎星羅松江入漢雲陣萬里據險要
以奪其覓斷糧道以折其膽多設疑兵使精悉而計亂
固列金湯使神茹而慮屈然後發衷詔馳輕驛辯辭重
幣陳列吉凶北敵天性愛奇慾則不剛畏我之威喜我
之賂畏威喜賂願和必矣陛下用臣之啓行臣之計何
憂玉門之下而無款塞之人哉彼之言戰既懇勲臣之
言和亦憚闕伏願察兩塗之利害檢二事之多少聖照
玄省灼然可斷所表謬奏希下之朝省使同博議臣謬

荷殊恩奉佐侯岳敢肆罄直伏奏千里帝不納

後魏世祖蒐于河西詔崔浩詣行在所議軍事浩表曰
昔漢武帝患匈奴彊盛故開涼州五郡通西域勸農積
穀為滅賊之資東西迭擊故漢未疲而匈奴已弊後遂
入朝平涼州臣愚以為北敵未平征役不息可不徙其
民案前故事計之長者若遷民人則土地空虛雖有
鎮戍適可禦邊而已至於大舉軍資必乏陛下知此事
濶遠竟不施用如臣愚意猶如前議募徙豪彊大家充

實涼土軍舉之日東西齊勢此計之得者

氏羌慕瓚奉表歸國尋討禽赫連定送之京師世祖嘉之遣使者策拜慕瓚為大將軍西秦王慕瓚表曰臣誠庸弱敢竭情款俘禽僭逆獻捷王府爵秩雖崇而土不增廓車旗既飾而財不周賞願垂鑒察亮其單款臣頃接寇逆疆境之人為賊所抄流轉東下令皇化混一求還鄉土乞拂白連窟畧寒張華等三人家弱在此分車可愍願并敕遣使恩洽遐荒存亡感戴世祖詔公卿朝

會議答施行太尉長孫嵩及議郎博士二百七十九人
議曰前者有司處以為秦王荒外之君本非政教所及
來則受之去則不禁皇威遠被西秦王慕義畏威稱臣
納貢求受爵號議者以為古者要荒之君雖人土衆廣
而爵不擬華夏陛下加寵王官乃越常分容飾車旗班
同上國至於繒絮多少舊典所無皆當臨時以制豐寡
自漢魏以來撫接荒遐頗有故事呂后遺單于御車二
乘馬二駟單于答馬千匹其後匈奴和親敵國遺繒絮

不過數百呼韓邪稱臣身自入朝始至方伯今西秦王
若以土無桑蠶便當上請不得言財不周賞昔周室衰
微齊侯小白一匡天下有賜胙之命無益土之賞晉侯
重耳破楚城濮唯受南陽之田為朝宿之邑西秦所致
唯定而已塞外之人因時乘便侵入秦涼未有經畧拓
境之勲爵登上國統秦涼河沙四州之地而云土不增
廓比聖朝於弱周而自同於五霸無厭之情其可極乎
西秦王忠款於朝廷原其本情必不至此或左右不敏

因致斯累檢西秦流人賊時所抄悉在蒲坂今既稱藩
四海咸泰天下一家可勅秦州送詣京師隨後遣還所
請乞拂三人昔為賓國之使來在王庭國破家遷即為
臣妾可勿聽許

高祖時楊椿為太僕卿加安東將軍初顯祖世有蠕蠕
萬餘戶降附居於高平薄骨律二鎮太和之末叛走畧
盡唯有一千餘家太中大夫王通高平鎮將郎育等求
徙置淮北防其叛走詔許之慮不從命乃使椿持節往

徙焉椿以為徙之無益上書曰臣以古人有言天子有道守在四夷荒忽之人羈縻而已是以先朝居之於荒服之間者正欲悅近來遠招附殊俗亦以別華戎異内外也今新附者罷若舊者見徙新者必不安不安必思土思土則走叛狐死首邱其害方甚又此族類生長邊隅樂冬便寒南土溼熱往必將盡進失歸伏之心退非藩衛之益徙在中夏而生後患愚心所見謂為不可時八座議不從遂徙於濟州緣河居之冀州元愉之難果

悉浮河赴賊所在鈔掠如椿所策

孝明帝熙平二年蠕蠕主醜奴遣使來朝抗敵國之書
不脩臣敬朝議將依漢答匈奴故事遣使報之司農少
卿燕州大中正張倫表曰臣聞古之聖王疆理物土辨
章要畝荒遐之俗政所不及故禮有壹見之文書著羈
縻之事太祖以神武之姿聖明之畧經畧帝圖日有不
暇遂令豎子遊魂一方亦由中國多虞急諸華而緩外
裔也高祖先宅土中業隆卜世赫雷霆之威震熊羆之

旅方役南轅未遑北伐昔舊京烽起敵使在郊主上按
劔璽書不出世宗運籌帷幄開境揚旌衣裳所及舟車
萬里于時敵人欵關上亦迷遵遺志今大明臨朝澤及
行葦國富兵彊能言率職何憚而為之何求而行此往
日蕭衍通敬求和以誠肅未純抑而不許先帝棄戎於
前陛下交敵於後無乃上乖高祖之心下違世宗之意
且彼雖慕德亦來觀我懼之以彊儻即歸附示之以弱
窺覲或起春秋所謂以我卜也又小人難近荒服無親

踈之則怨狎之則侮其所由來久矣是以高祖世宗知其若此來既莫逆去又不追不一之義於是乎在必其委質玉帛之辰屈膝蕃方之禮則可豐其勞賄籍以珍物至於王人遠役銜命敵庭優以匹敵之尊加之相望之寵恐徒生侮慢無益聖朝假令選衆而舉使乎稱職資酈生之辯騁終軍之辭憑軾下齊長纓繫越苟異曩時猶為不願而況極之以隆崇申之以宴好臣雖下愚輒敢固執若事不獲已應頒制詔示其上下之儀宰臣

致書諷以歸順之道若聽受忠誨明我語言則萬乘之
盛不失位於域中天子之聲必籠罩於無外脫或未從
焉能損益徐舞干戚以招之敷文德而懷遠如迷心不
已或肆憑陵則當命辛李之將勒衛霍之師蕩定雲沙
掃清逋孽飲馬瀚海之濱鏤石燕然之上開都護置戍
已斯亦陛下之高功百世之盛事如思按甲養民務農
安邊之術經國之防豈可以異族兼并而遽虧典制將
取笑於當時貽醜於來葉昔文公請隧襄后有言荆莊

問鼎王孫是抑以古方今竊為陛下不取又陛下欲禮神岷瀆致禮衡山登稽嶺窺蒼梧而反與荒服之君荒服之長結昆弟之忻抗分庭之義將何以瞰文命之遐景迹重華之高風者哉臣以為報使甚失如彼不報甚得如此願留須臾之聽察愚臣之言

正光二年詔遣楊鈞送蠕蠕主阿那瓌還國諫議大夫張普惠謂遣之將貽後患上疏曰臣聞乾元以利貞為大非義則不動皇王以博施為功非類則不從故能始

萬物而化天下者也伏惟陛下睿哲欽明道光虞舜八
表宅心九服清晏蠕蠕相害於朔垂妖師扇亂於江外
此乃異域之人不識王度天將悔其罪所以奉皇魏故
荼毒之辛苦之令知至道之可樂也宜安民以悅其志恭
已以懷其心而先自勞擾艱難下民興師郊甸之內遠
投荒塞之外救累世之勍敵可謂無名之師諺曰唯亂
門之無過愚情未見其可當是邊將窺竊一時之功不
思兵為凶器不得已而用之者也夫白登之役漢祖親

困之樊噲欲以十萬衆橫行匈奴中李布以為不可請
斬之千載以為美況今旱酷異常聖慈降膳乃以萬五
千人使楊鈞為將而欲定蠕蠕忤時而動其可濟乎阿
那瓌投命皇朝撫之可也豈容困疲我兆民以資天喪
之徒昔莊公納子糾以致乾時之敗魯僖以邾國而有
懸胃之耻今蠕蠕時亂後主繼立雖云散亡內自虞難
抑腕有井陘之慮楊鈞之肉其可食乎高車蠕蠕連兵
積年饑饉相仍須其自斃小亡大傷然後一舉而并之

此卞氏之高畧所以獲兩虎不可不圖之今土山告難
簡書相續蓋亦無能為也正與今舉相會天其或者欲
以告戒人不欲使南北兩疆並興大衆脫狂狡構間於
其間而復事連中國何以寧之今宰輔專欲好小名不
圖安危大計此微臣所以寒心者也那瓌之不還負何
信義此機之微際北師宜傳臣言不及義文書所經過
不敢不陳兵猶火也不戢將自焚也彼焚滅之形可以
為殷鑒伏願輯和萬國以靜四疆混一之期坐而自至

矣臣愚昧多違必無可採匹夫之志願以呈獻表奏荅
曰夫窮獸歸人尚或興惻況那瓌嬰禍流離遠來依庇
在情在國何容勿矜且納亡興喪有國大義皇魏堂堂
寧庇斯德後主亂亡似當非謬此送彼迎想無拒戰國
義宜表朝筭已決卿深誠厚意朕用嘉戢俾此段機畧
不獲相從脫後不逮勿憚匡言

莊帝時蠕蠕主阿那瓌返國其人大饑相率入塞上表
請臺賑給詔尚書左丞拓跋孚為北道行臺詣彼賑恤

孚陳便宜表曰荒服之人未嘗粒食宜從俗因利拯其所無昔漢建武中單于款塞時轉河東米糒二萬五千斛牛羊三萬六千頭以給之斯即前代和戎撫新柔遠之長策也乞以特牛產羊餉其口命且畜牧繁息是其所便毛血之利惠兼衣食又尚書奏云如其仍住七州隨寬置之臣謂人情戀本寧肯徙內若依臣請給賑雜畜愛本重鄉必還舊土如其不然禁留益損假令逼徙事非久計何者靡常之性去留難測既易水草痾恙將

多憂愁致困死亡必甚其餘類尚在沙磧脫出狂勃
翻歸舊巢必殘掠邑里遺毒百姓亂而方塞未若杜其
未萌又貿遷起於上古交易行於中世漢與邊通亦立
關市今北人阻饑命懸溝壑公給之外必求市易彼若
願求宜見聽許又云營大者不計小名圖遠者弗拘近
利雖邊鄙衰盛歷代不同叛服之情畧可論討周之北
伐僅獲中規漢氏外攘裁收下策昔在代京恒為重備
將帥勞止甲士疲力前世苦之計未能致今天祚大魏

亂亡在彼朝廷垂天覆之恩廓大造之德鳩其散亡禮
送令返宜因此時善思遠策竊以理雖萬變可以一觀
來事雖懸易以往卜昔漢宣之世呼韓款塞漢遣董忠
韓昌領邊郡士馬送出朔方因留衛助又光武時亦令
中郎將段彬置安集掾史隨單于所在參察動靜斯皆
守吉之元龜安邊之勝策計今朝廷成功不減曩時蠕
蠕國弊亦同疇日宜準昔成謨畧依舊事借其所閑地
聽使田牧粗置官屬示相慰撫嚴戒邊兵以見保衛馭

以寬仁縻以久策使親不至矯詐跡不容叛反今北鎮諸將舊常云一人代外邇因令防察所謂天子有道守在四夷者也又云先人有奪人之心待降如受強敵武非專外亦以防內若從處分割配諸州鎮遼遠非轉輸可到悔叛之情變起難測又居人畜業布在原野戎人性貪見則思盜防彼肅此少兵不堪渾流之際易相干犯驅之還本未必樂去配州內徙復不肯從既其如此其費必大朝廷不許

隋文帝開皇元年突厥攝圖曰我周家親也今隋公自立而不能制復何面目見可賀敦乎因與高寶寧攻陷臨渝鎮約諸面部落謀共南侵帝新立由是大懼修築長城發兵屯北境命陰壽鎮幽州虞慶則鎮并州屯兵數萬人以為之備奉車都尉長孫晟先使突厥知攝圖玷厥阿波突利等叔姪兄弟各統強兵俱號可汗分居四面內懷猜忌外示和同難以力征易可離間因上書曰臣聞喪亂之極必致升平是故上天啓其機聖人成

其務伏惟皇帝陛下當百王之末膺千載之期諸夏雖
安戎場尚梗興師致討未是其時棄於度外又復侵擾
故宜密運籌策漸以攘之計失則百姓不寧計得則萬
代之福吉山所係伏願詳思臣於周末忝充外使匈奴
倚伏實所具知玷厥之於攝圖兵強而位下外名相屬
內隙已彰鼓動其情必將自戰又處羅侯者攝圖之弟
姦多而勢弱曲取於衆心國人愛之因為攝圖所忌其
心殊不自安迹示弥縫實懷疑懼又阿波首鼠介在其

間頗畏攝圖受其牽率唯強是與未有定心今宜遠交而近攻離強而合弱通使玷厥詭合阿波則攝圖迴兵自防右地又引處羅遣連奚雷則攝圖分衆還備左方首尾猜嫌腹心離阻十數年後承釁討之必可一舉而空其國矣上省表大悅因召與語晟復口陳形勢手畫山川寫其虛實皆如指掌上深嗟異皆納用焉

七年突厥攝圖死遣長孫晟持節拜其弟處羅侯為莫何可汗以其子雍間為葉護可汗處羅侯因晟奏曰阿

波為天所滅與五六十騎在山谷間伏聽詔旨當取之以獻乃召文武議焉樂安公元諧曰請就彼梟首以懲其惡武陽公李充曰請生將入朝顯僇以示百姓上謂歲曰於卿何如歲對曰若突厥背誕須齊之以刑今其昆弟自相夷滅阿波之惡非負國家因其困窮取而為戮恐非招遠之道不如兩存之上曰善

二十年都藍大亂為其部下所殺歲為驃騎將軍因奏請曰今王師臨境戰數有功賊內攜離其主被殺乘此

招誘必並來降請遣染干部下分頭招慰上許之果盡
來附達頭恐怖又大集兵詔晟部領降人為秦川行軍
總管取晉王諱節度出討達頭與王相抗晟進策曰突
厥飲泉易可行毒因取諸藥毒水上流達頭人畜飲之
多死於是大驚曰天雨惡水其亡我乎因夜遁晟追之
斬首千餘級俘百餘口六畜數千頭上大喜

開皇中容納突厥啓民居於塞內光祿大夫段文振恐
為國患上表曰臣聞古者帝王御宇内外有防周宣薄

伐獫狁秦帝築城萬里蓋遠圖良筭弗可忘也竊見國
家容受啓民資其兵食假以地利如臣愚計竊又未安
何則敵人之性無親而貪弱則歸投強則反噬蓋其本
心也臣學非博覽不能遠見且聞晉朝劉曜梁代侯景
近事之驗衆所共知以臣量之必為國患如臣之計以
時喻遣令出塞外然後明設烽候緣邊鎮防務令嚴重
此乃萬歲之長策也

文帝征高麗文振為左候衛大將軍出南蘇道道病上

表曰陛下以遼東未服親降六師敵人多詐深須防擬
口陳降款毋宜遽受水潦方降不可淹遲惟願嚴勒諸
軍星馳速發水陸俱前出其不意則平壤孤城勢必可
拔如不時定脫遇秋霖兵糧必竭彊敵在前秣鞫出後
遲疑不決非上策也及卒帝甚惜之

煬帝大業三年幸榆林欲出塞外陳兵耀武經突厥中
指于涿郡仍恐染干驚懼先遣長孫晟往喻旨稱述帝
意染干聽之因召所部諸國奚雷室韋等種落數十酋

長咸萃歲以牙中草穢欲令染干親自除之示諸部落以明威重乃指帳前草曰此根大香染干遽嗅之曰殊不香也歲曰天子行幸所在諸侯躬親灑掃耘除御路以表至敬之心今牙中蕪穢謂是留香草耳染干乃悟曰奴罪過奴之骨肉皆天子賜也得効筋力豈敢有辭特以邊人不知法耳賴將軍恩澤而教導之將軍之惠奴之幸也遂拔所佩刀親自芟草其貴人及諸部爭倣倣之乃發榆林北境至于其牙又東達于薊長三千里廣

百步舉國就役而開御道帝聞晟策乃益嘉焉

西域諸蕃多至張掖與中國交市帝令尚書左丞裴矩掌其事矩知帝方勤遠畧諸遠裔至者矩誘令言其國俗山川險易撰西域圖記三卷入朝奏之其序曰臣聞禹定九州導河不踰積石秦兼六國設防止及臨洮故知西域諸部僻居遐裔禮教之所不及書典之所罕傳自漢氏興基開拓河右始稱名號者有三十六國其後分立乃五十五王仍置校尉都護以存招撫然叛服不

恒屢經征戰後漢之世頻廢此官雖大宛以來畧知戶數而諸國山川未有名目至如姓氏風土服章物產全無纂錄世所弗聞復以春秋邇謝年代久遠兼并誅討互有興亡或地是故邦改從今號或人非舊類因襲昔名兼復部民交錯封疆移改異域音殊事難窮驗于闐之北蔥嶺以東考于前史三十餘國其後更相屠滅僅有十存自餘淪沒掃地俱盡空有邱墟不可記識皇上膺天育物無隔中外率土黔黎莫不慕化風行所及日

入以來職貢皆通無遠不至臣既因撫納監知關市尋
討書傳訪採邊人或有可疑即譯衆口依其本國服飾
儀形王及庶人各顯容止即丹青模寫為西域圖記共
成三卷合四十四國仍別造地圖窮其要害從西頃以
去北海之南縱橫所互將二萬里諒由富商大賈周遊
經涉故諸國之事罔不徧知復有幽荒遠地卒訪難曉
不可憑虛是以致闕而二漢相踵西域為傳戶民數十
即稱國王徒有名號乃乖其實今者所編皆餘千戶利

盡西海多產珍異其山居之屬非有國名及部落小者
多亦不載發自敦煌至于西海凡為三道各有襟帶北
道從伊吾經蒲類海鐵勒部突厥可汗庭度北流河水
至拂菻國達于西海其中道從高昌焉耆龜茲疏勒度
葱嶺又經鎡汗蘇對沙那國康國曹國何國大小安國
穆國至波斯達于西海其南道從鄯善于闐朱俱波唱
槃陀度葱嶺又經護密吐火羅挹怛怛延漕國至北婆
羅門達于西海其三道諸國亦各自有路南北交通其

東女國南婆羅門國等並隨其所往諸處得達故知伊
吾高昌鄯善並西域之門戶也總奏敦煌是其咽喉之
地以國家威德將士驍雄汎濛汜而揚旌越崑崙而躍
馬易如反掌何往不至但突厥吐渾分領氐羗之國為
其擁遏故朝貢不通今並因商人密送誠款引領翹首
願為臣妾聖情含養澤及普天服而撫之務存安輯故
皇華遣使弗動兵車諸蕃既從渾厥可滅混一戎夏其
在茲乎不有所記無以表威化之遠也帝大悅

帝巡于塞北幸啓民帳時高麗遣使先通于突厥啓民不敢隱引之見帝矩為銀青光祿大夫因奏狀曰高麗之地本孤竹國也周代以之封于箕子漢世分為三郡晉氏亦統遼東今乃不臣別為外域故先帝疾焉欲征之久矣但以楊諒不肖師出無功當陛下之時安得不事使此冠帶之境仍為蠻貊之鄉乎今其使者朝于突厥親見啓民合國從化必懼皇靈之遠暢慮後伏之先亡脅令入朝當可致也帝曰如何矩曰請面詔其使放

還本國遣語其王令速朝覲不然者當率突厥即日誅
之帝納焉



歷代名臣奏議卷三百四十